

## 《五陰譬喻經》 CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 2, No. 105

### No. 105 [No. 99(265), No. 106]

#### 五陰譬喻經

##### 後漢安息三藏安世高譯

聞如是。一時佛遊於靡勝國。度河津見中大沫聚隨水流。即告比丘言。諸比丘。譬如此大沫聚隨水流。目士見之觀視省察。即知非有虛無不實速消歸盡。所以者何。沫無強故。如是比丘。一切所色去來現在。內外麤細好醜遠近比丘。見此當熟省視觀。其不有虛無不實。但病但結但瘡但偽。非真非常為苦為空為非身為消盡。所以者何。色之性無有強。譬如比丘天雨滄水一泡適起一泡即滅。目士見之觀視省察。即知非有虛無不實速消歸盡。所以者何。泡無強故。如是比丘。一切所痛去來現在。內外麤細好醜遠近。比丘見知當熟省視觀其不有虛無不實。但病但結但偽但瘡。非真非常為苦為空為非身為消盡。所以者何。痛之性無有強故

譬如比丘季夏盛熱日中之炎。目士見之觀視省察。即知非有虛無不實速消歸盡。所以者何。炎無強故。如是比丘。一切所想去來現在。內外麤細好醜遠近。比丘見是當熟省視觀。其不有虛無不實。但姪但結但瘡但偽。非真非常為苦為空為非身為消盡。所以者何。想之性無有強

譬如比丘人求良材擔斧入林。見大芭蕉鴻直不曲。因斷其本斬其末劈其葉。理分分剝而解之。中了無心何有牢固。目士見之觀視省察。即知非有虛無不實速消歸盡。所以者何。彼芭蕉無強故。如是比丘一切所行去來現在。內外麤細好醜遠近。比丘見此當熟省視知。其不有虛無不實。但姪但結但瘡但偽。非真非常為苦為空為非身為消盡。所以者何。行之性無有強

譬如比丘幻師與幻弟子於四衢道大人眾中。現若干幻化作群象群馬車乘步從。目士見之觀視省察。即知不有虛無不實無形化盡。所以者何。幻無強故。如是比丘。一切所識去來現在。內外麤細好醜遠近。比丘見此當熟省視觀。其不有虛無不實。但姪但結但瘡但偽。非真非常為苦為空為非身為消盡。所以者何。識之性無有強。於是佛說偈言

沫聚喻於色	痛如水中泡
想譬熱時炎	行為若芭蕉
夫幻喻如識	諸佛說若此
當為觀是要	熟省而思惟
空虛之為審	不覩其有常

欲見陰當爾 真智說皆然  
三事斷絕時 知身無所直  
命氣溫燻識 捨身而轉逝  
當其死臥地 猶草無所知  
觀其狀如是 但幻而愚貪  
心心為無安 亦無有牢強  
知五陰如此 比丘宜精勤  
是以當晝夜 自覺念正智  
受行寂滅道 行除最安樂  
佛說如是比丘聞皆歡喜

### 五陰譬喻經